

**ZANJI PLES**

Kak lepa senja,  
kak draga tenja,  
kak da vetrek večernji lefko  
diha,  
jene noči došla bo k meni,  
na vankuš stiha,  
Podravina moja,  
sa dišeča od trav,  
dufteča od cvetja i sena,  
sa pisana od cifraste krav,  
od snegov bela  
kaj šumeče dravske pene  
zlatna od švasteče pšenic,  
sa svilena od plave vran,  
sa triščeča od srebrenе mrtvic,  
rumena kaj krv  
od sonca zaran,  
sa raspopovana od žvrgolaste ftic.

Jene noči,  
kak najlepša senja,  
kak najdrakša tenja,  
kak vetrek pramaletni  
dok lefko diha,  
došla bo k meni,  
na vankuš stiha,  
Podravina moja,  
nasmejana kaj mladenka srečna  
s črešnjinem cvetom prekrita,  
vu zvezdanom prahu vmita.

\*\*\*\*\*

I svet zdavnašnji  
vu doge kodelašne gačaj  
i široke nabrane suknjaj  
po ravnici megleni  
ze seov stran prihadal bo k meni  
vu dogi, dogi prešenciji jeni.  
I Podravina moja,  
mazno kaj mati,

rekla mi bo:  
se noči je tvoje  
zanje venčanje –  
dosta si zestekal.

Srce ji moje bo šepnolo na to:  
Navek sem rad te imal,  
komaj te dočekal!

Onda hegede bodo na tenko zaigrale,  
cimbole mefko zabrenčale  
kaj podravski večernji zvoni v ravnici.  
Možika slatka deždila bo na nas z nebesa.

A Podravina i ja  
zatancali si bomo ftečno  
zanjega nerazdvojnoga plesa.  
I vu te mah  
postal bom zemla –  
vekvečni plodni  
podravski prah.

## NEZREČENA REČ

Franu Galoviću

Mačva,  
hilado devetsto  
četrnajsto  
leto.

Nacilal je nešče –  
lucko srce zel za  
meto.

Drobnoga štrenclina  
prst je crni zlefka  
pritisnol.

Vu podravski zemli  
visoki je kostanj  
vrisnol.

Vu Mačvi ravni,  
hilado devetsto  
i četrnajstoga  
leta  
pesničko srce senjarsko  
zdeni smrti bilo je  
meta.

Šepni mi, Fran,  
je l' te v srcu  
železna kugla piče?

Otišel si zaran.

Poveč mi, Fran,  
je l' te boli kaj nesi dokraja  
svojo reč domačo dospel zreči?

Šepni mi, Fran,  
kaj pesnika morebole peči,  
al reč nezrečena,  
al kugla vu srcu  
zapečena?

Poveč mi, Fran!  
Kostanj je tvoj  
ostal neobran.

Ja čekam tvojega šepeta  
dok jesenski oblaki nad  
šumom leže  
i rodni kostanji reže...

Neso to kostanji.

To me odsakod vezda glede  
nebrojene tvoje polumrtve  
joči.

Ja čekam, Fran,  
i poslušam vetra kak čez  
žoto listje ide  
plačoči.

Otišel si od nas  
zaran.  
Ostal je kostanj  
tvoj  
neobran.

Šepni mi, Fran,  
čez listje zvehnjeno  
kulko je v tvojem srcu  
još ostalo ran?

## ŽARE SE GLAJŽI

Ivanu Generaliću

Toga je dneva  
vu vreme sivo  
zajafkal cinkuš plačlivo:  
slikar Ivina otišel na drugi je svet.

Zanemeli so beli jeleni rikači,  
od jada se ščvrkla podravska klet.  
Soze so spustili cvetje i drači,  
vu tancu se norom skamenili svati.  
Vrisnol je zdvojno konjek rogati.  
Kukurek se pevčev pretrgel na pol,  
skalile se joči srebrene mrtvic,  
flaša aldomaša opala pod stol,  
zadregla se popevka v požiraku ftic.

Kotura se vreme nevmrlo  
kaj žmefko melinsko kamenje.

Žare se njegvi glajži i kipci  
kak lepe, kak drage, kak slatke senj –  
to lucko vekvečno čežnjenje,  
to lucko cvetoče semenje,  
to lucko žilavo korenje,  
nigdar zatrto lucko hrepenenje  
da navek se gore  
ide,  
da se na vrh brega  
zide.

Čudeslivo se žare glajži i kipci:  
kak vu zorji rosнатi rascvela grana  
na deklini lesi,  
kaj v kmici vu podravski ravnici  
beli ivanski kresi,  
kak vu srcu drfčočem prvo lublenje.

Glede nas s glajžov i kipcov joči njegve  
i njegve senje –  
naše i njegvo negdašnje  
življenje.

